Item that the aldermen of the seid citee of Norwich beforseid and iche of hem xal come to the mair to the Gildehall er to any other place with inne the boundes of the seid citee of Norwich where the mair will common, er spoken of, maters necessarie for the citee and the good governaunce of the same, after the discrecion of the mair, whan thei been warned be the mair or any of his officers er be any other person assigned be the mair and that he kepe his owr that he is warned but if he have swiche a cause as the mair for the tyme beyng may fullich been enformyld that is resonable to ben excused by, and whiche of hem alle do the contrarie of this, for to paye vj. d. for his defauyte and, if in discrecion of the mair the mater be so necessari that his persone, all excusions left, nedes must ben had, that thanne he to be redy up forme beforseid upon swiche peyne as the mair be the advys of the xxiiij aldermen, er the more part of hem, wyl sentyn and assignen. Item that alle the xxiiij aldermen and yche of hem sal secretly kepe all the counsell and communicacion of alle matiers of charge of the seid discrecion shewed er move be the mair and xxiiij aldermen with inne hem self touchyng good governaunce forseid, in to which tyme thei been shewid and declared in a comon assemble which xel ben ordeyned be the mair and the xxiiij aldermen er the more part of hem, er in any other place where the said mair and aldermen er the more part of hem thynkith resonable, and what alderman do the contrarie of this poynt in maters chargeables after the seid discrecion to be kept counsell, thanne that alderman so founden in defauyte for to ben discharged of the estate of alderman and put out of counsell be the mair and the aldermen, er the most part of hem, after that tyme that his defauyte be proved er witnessed be the more part of the residue of the xxiiij aldermen. Item that all the xxiiij aldermen and iche of hem xal with all hir myght and knouyng supporten the mair for the tyme beyng in comyng to hym and counsell ghevyng, in walkyng with hym on principal dayes and in procession or to any lord er lady er persone of wurship in to any place with inne the citee assigned be the mair, in supportyng, counselyng, comfourtyng and streyngthyng of the mair and wurship of the citee, whan thei be warned be the mair er be any of his officers, and whiche of hem do the contrarye of thes, for to payen vj. d. for his defauyte and, if his presence with outen excusacion nedeth to been had, thanne he to be redy up on swich forme and peyne as the mair, be the advys of the xxiiij aldermen er the more part of hem, wyl settyn and assignen. Item that non of the xxiiij. aldermen xal take sewte ne querell in no maner wyse agkens any of his felas aldermen in to that tyme that he hath shewyd and declared his compleynt and his aggrevauus to the mair and to dyvers persone of the maires counsell, aldermen, and, if it be founden that any swiche persone of the xxiiij aldermen hath made his compleynt and his aggrevauus shewyd be dyvers tymes to the mair and his counsell, aldermen, and may no remedy han, than he xal shew his matters and his aggrevauus to the more part of the xxiiij aldermen, how and in what wyse he hath compleyned hym and is nought remediyyd, and, after that tyme of his compleynt and his aggrevauus thus shewyd and declared, it xal be lefful to any swiche persone of the xxiiij. aldermen to take his sewte and his accion wher that hym lyketh and which of hem do the contrarie of this in forme beforseid.